

मार्निंग डोगरी न्यूज बुलेटिन, समें. 09.20 Hrs

<><><><><><>

Headlines

- 1- प्रधानमंत्री नरेंद्र मोदी होरें आखेआ ऐ जे वंचित वर्गें दे विकास दे बगैर विकसित भारत दा लक्ष्य हासिल नैई कीता जाई सकदा। उनें 1 लकख उद्यमिं गी दोआर-कर्जे दी सुविधा आला पी.एम सूरज पोर्टल शुरू करोआया।
- 2- प्रधानमंत्री होर अज्ज दिल्ली च पी.एम स्वनिधि दे लाभार्थिं गी संबोधित करडन।
- 3- भारती चुनांस आयोग नै आखेआ ऐ जे जम्मू-कश्मीर च लोकसभा ते असैम्बली दे चुनांस कन्नो-कन्नी करोआने बारे कोई मुकदा फैसला लैने शा पैहले सब्बनें सरबंधत पक्खें कन्नै सलाह-सुत्तर कीता जाग।
- 4 जंदी रातीं होई दी बरखा करी प्हाड़ें परा ल्हास-पस्सियां पौने दे चलदे जम्मू-श्रीनगर राश्ट्री जरनैली शिड़क केईं थाहरें पर गड़डिं दी आओजाई लेई बंद ऐ।

-----

<><><><><><>

PM-Suraj

प्रधानमंत्री नरेंद्र मोदी होरें आखेआ ऐ जे समाज दे दबोए लतड़ोए दे ते बेगौरे तबके दे विकास ते सशक्तिकरण दे बगैर 2047 तगर भारत गी इक विकसित राश्ट्र बनाने दा लक्ष्य हासल नैई कीता जाई सकदा। उनें आखेआ जे सरकार आस्सेआ रम्भी गेदिं योजनां जिंदे च मुफ्त

राशन, मुफ्त इलाज मुआलजा, पक्का मकान, शौचालय ते उज्जवला गैस कनेक्शन जनेइएं स्कीमें दा लाह इनें वर्गे गी इस्सै करियै पैहल दी बिनाह पर पुजाया जा'रदा ऐ। कल संझा प्रधानमंत्री सामाजिक उत्थान एवं रोजगार आधारित जन कल्याण जिसी पी.एम सूरज नां दिता गेदा ऐ, दे राश्ट्री पोर्टल दी शुरूआत करदे मौके प्रधानमंत्री होरें बेगौरै तबके कन्नै ताल्लुक रखने आले 1 लक्ख उद्यमिं दोआर सहायता मंजूर कीती ऐ। मोदी होरें आखेआ जे सरकार पट्टीदर्ज जातिं, पट्टी दर्ज जनजातिं ते होरनें पिछड़े वर्गे दे सशक्तिकरण लेई हर मुमकिन कोष्ट करा'रदी ऐ ते उनेंगी दिती जाने आली माली सहायता गी पिछले 10एं ब'रें च बधाइए दूना करी दिता गेदा ऐ ते शड़ा इस्सै साल इनें वर्गे गी 1 लक्ख 60 जहार करोड़ रपे दी सहायता दिती गई ऐ।

<><><><><><>

### LG-Suraj

उपराज्यपाल मनोज सिन्हा होरें आखेआ ऐ जे केंद्र शासित प्रदेश सरकार नै केंद्र सरकार कन्नै मिलिए समाज दे कमजोर, दबोए लतड़ोए दे बेगौरै तबके दे लोकें दे जीवन स्तरै गी उबड़ा चुक्कने लेई केई गेई पुट्टियां न। प्रधानमंत्री नरेंद्र मोदी हुंदे आस्सेआ कल पी.एम-सूरज राश्ट्री पोर्टल दी शुरूआत दे सिलसिले च लोआए गेदे कार्यक्रम च वर्चुअल तरीके नै शिरकत करदे मौके एल.जी होरें आखेआ।

इस मौके पर शैड्यूल्ड कास्ट, शैड्यूल्ड ट्राइब्ज ते सफाई कर्मचारी वर्ग कन्नै ताल्लुक रखने आले 1 जहार 747 लाभार्थिं गी अपना कम्म-रोजगार शुरू करने लेई माली सहायता उपलब्ध

कराई गई। प्रधानमंत्री हों इस मौके कठुआ दी इक लाभार्थी नीलम कुमारी कन्नै बी गल्ल कीती जिन्नै सरकार दी दोआर सुविधा दा फैयदा हासल करदे होई अपनी बुटीक शुरू कीती ऐ। नीलम एहदे अलावा उज्जवला, पी.एम आवास, आयुष्मान ते स्वच्छ भारत स्मीम दी बी लाभार्थी ऐ। प्रधानमंत्री हों सरकार दिएं स्कीमें थमां लाह ठोआने ते अपना कम्म शुरू करिए होरनें महिलाएं गी बी कम्म रोजगार देने लेई नीलम कुमारी दी सिफ्त कीती।

<><><><><><>

Jatinder Singh

प्रधानमंत्री हुंदे दफतरै च राज्यमंत्री डॉक्टर जितेंद्र सिंह हों आखेआ ऐ जे प्रधानमंत्री नरेंद्र मोदी हुंदे आस्सेआ आंदे गेदे समाजी आर्थिक सुधारें आम लोकें दिएं आसें-तांगें गी बी बधाया ऐ ते अज्ज हर इक नागरिक एह मसूस करा करदा ऐ ते सब्बै बुनियादी सहूलतां उसी थहोनियां गे लोड़चदियां जेहड़ा जे लोकतंत्र दा अस्सल जज्बा ऐ। कल पी.एम सूरज राश्ट्री पोर्टल दी शुरूआत दे मौके पर आयोजित कार्यक्रम च वर्चुअल ढंग्गै नै शिरकत करदे होई डा. जितेंद्र सिंह हों आखेआ जे मजूदा सरकार आस्सेआ आंदे गेदे सुधारें दे चलदे मुख्य भरै च कम्म करने दी संस्कृति गी बढ़ावा थहोआ ऐ।

<><><><><><>

PM-Svanidhi

प्रधानमंत्री नरेंद्र मोदी होर दिल्ली दे ज्वाहर लाल नेहरू स्टेडियम थवां पी.एम स्वनिधि दे लाभार्थिं गी संबोधित करडन। कार्यक्रम च प्रधानमंत्री मोदी होर इक लक्ख रेहड़ी-फड़ी आलें गी योजना तैहत दोआर बी बंडडन। एहदे च दिल्ली दे 5 जहार रेहड़ी-फड़ी आले बी शामिल न। मोदी

होर दिल्ली मेट्रो दे चौथे गेड़ दे दो बादू कारीडोर दा नीह पत्थर रक्खडन। एह लाजपत नगर सोयां साकेत गी ब्लाक कारीडोर ते इंद्रलोक थवां इंद्रप्रस्त कारीडोर होडन जिंदी कुल लंबाई 20 किलोमीटर थवां मती होग। प्रस्तावित गलियारे सोयां कनेक्टिविटी च सुधार होग ते यातायात सखल्ला होग।

<><><><><><>

### BJP-2<sup>nd</sup> List

भारती जनता पार्टी नै औंदे लोकसभा चुनाएं आस्तै 72 मेदवारें दी दुई सूची जारी कीती। केंद्री मंत्री अनुराग सिंह ठाकुर हिमाचल प्रदेश दी हमीरपुर, नितिन गडकरी नागपुर, पीयूष गोयल उत्तरी मुम्बई ते डाक्टर भारती प्रवीण पवार महाराष्ट्र दी डिंडोरी सीट थवां चुना लडडन।

<><><><><><>

### Kidney-Day

अज्ज विश्व किडनी दिवस ऐ। एह दिन मार्च म्हीने दे दुए वीरवार लोकें च किडनी यानि गुर्दे दी सेहत ते ओदे कन्ने जुड़ी दी बमारिएं बारै जागरूकता फैलाने दे मकसद कन्ने मनाया जंदा ऐ। इस साल दा विषय सार ऐ किडनी हेल्थ फॉर ऑल, एह विषय सार गुर्दे कन्ने जुड़ी दिएं गंभीर बमारिएं दी रोकथाम ऐ। गुर्दे सारे शरीर चा विशैले पदार्थ बाहर कड्डने दा कम्म करदे न ते सानू सेहतमंद रखदे न।

<><><><><><>

भारत दे मुख चुना आयुक्त राजीव कुमार होरें आखेआ ऐ जे चुनांस आयोग जम्मू-कश्मीर च लोकसभा ते असैम्बली दे चुनांस करोआने बारै फिक्रमंद ऐ पर इनें दौनें चुनाएं गी कन्नो-कन्नी करोआने शा पैहले सुरक्षा एजेंसिएं सने सबबनें सरबंधत पक्खें कन्नै सलाह-सूत्र कीता जाग। आकाशवाणी दे जम्मू संवाददाता दी रिपोर्ट मुजब जम्मू-कश्मीर दे त्रउं दिनें दे दौरे पर आई दी चुनांस आयोग दी टीम कल दपैही जम्मू पुज्जी ते मीडिया कन्नै गल्लबात कीती। मुख चुनांस आयुक्त होरें इस गल्लै पर जोर पाया जे आयोग जम्मू-कश्मीर च लोकसभा ते विधानसभा दे चुनांस करोआने बारै फिक्रमंद ऐ ते चुनांस तौले गै करोआए जाडन। उनें आखेआ जे मती सारी सियासी पाएं एह मंग कीती ऐ जे जम्मू-कश्मीर च लोकसभा ते असैम्बली दे चुनांस कन्नो-कन्नी करोआए जान।

<><><><><><>

## GPS

भारती चुनांस आयोग दे दिश-निर्देशों दी पालमा करदे होई जम्मू-कश्मीर दा चुनांस विभाग प्रदेश च औंदे लोकसभा चुनाएं लेई चुनावी ड्यूटी पर तैनात 12 जहार 500 गड्डिएं गी जी.पी.एस कन्नै लै करने दी तैयार च लग्गे दा ऐ। जिला चुनांस अधिकारिएं ते मुख चुनांस अधिकारी हुंदे दफ्तरें च जी.पी.एस नियंत्रण कक्ष खडरे जाडन तां जे इलैक्ट्रानिक वोटिंग मशीनें ते वी.वी-पैट मशीनें गी लेइयै जा'रदी गड्डिएं दी लोकेशन यानि केहड़ी गड्डी केहडे बेल्ले कुत्थे पुज्जी दी ऐ, एहदी सटीक जानकारी कन्नोकन्नी हासल हुंदी रवै।

<><><><><><>

Chief-Secy.

मुकख सचिव अटल डुल्लू होंरें विश्व बैंक दी माली मदाद कन्नै चलाए जा'रदे झेहलम ती फलड रिकवरी प्रोजेक्ट तैहत जारी कम्में दी प्रगति दा जायजा लैता। उनें सरबंघत अधिकारिणं पर जोर पाया जे ओह 213 उप-परियोजनाएं लेई तकरीबन 140 करोड़ रुपें दी बचत रकम आहली इक योजना तैयार करन। उनें सेहत, शिक्षा, आपदा प्रबंधन ते कम्म-रोजगार पैदा करने दे खेतरे च ढांचागत विकास बक्खी बी चेचा ध्यान देने लेई बी आखेआ। आर्थिक पुननिर्माण एजेंसी इरा दिणं मुकख कार्यकारी अधिकारी डाक्टर सैय्यद सहरिश असगर होंरें झेहलम तवी फलड रिकवरी परियोजना तैहत हासल प्रगति बारे जानकारी दिती ते दस्सेआ जे कुल 213 उप-परियोजनाएं चा 186 प्रोजेक्ट सबूरे करी लैते गेदे न ते इंदे पर 1 जहार 363 करोड़ रुपे खर्च कीते गेदे न।

<><><><><><>

### LG-Souvenir

डाक सेवाएं सरबंधी जम्मू-कश्मीर सर्कल दे निदेशक प्रतीक सिंह कल राजभवन जाइए उपराज्यपाल मनोज सिन्हा होंरें गी मिले ते उनेंगी मैहकमा डाक दे कम्मै-काजै बारे ब्यौरा दिता। उनें एल.जी होंरें गी श्री राम जन्म भूमि मंदर दी इक यादगारी टिकट भेंट कीती। इस मौके उंदे कन्नै असिस्टेंट पोस्ट मास्टर जनरल शाह नवाज खान होर बी गेदे हे। उंदे कन्नै गल्लबात दौरान एल.जी होंरें जोर देइए आखेआ जे दूर-दरेडे इलाकें बक्खी टकोहदा ध्यान दिंदे होई जम्मू-कश्मीर च डाक सेवाएं गी होर बेहतर बनाने दे सब्बै उपा कीते जान।

<><><><><><>

### NH-Blocked-PTC

जंदी रातीं होई दी बरखा ते प्हाडें परा ल्हास-पस्सियां पौने करी जम्मू-श्रीनगर राश्ट्री जरनैली शिडक रामबन ते बनिहाल बश्कार केई थाहरें पर बंद होई गेदी ऐ। आकाशवाणी दे रामबन संवाददाता दी रिपोर्ट मुजब ट्रैफिक पुलसै लोके गी सलाह् दिती ऐ जे ओह् मौसम च सुधार होने ते जम्मू-श्रीनगर राश्ट्री जरनैली शिडक गी ब्हाल करने तगर एहदे पर सफर शा परहेज करन। तोआई मुगल रोड, भद्रवाह-चंबा शिडक ते किशतवाड़-सिंथन शिडक अजे बी बर्फ पेदी होने कारण गड्डिएं दी आओजाई लेई बंद न।

<><><><><><>

### ADC-Absent

किशतवाड़ दे ए.सी.डी होरें ग्रामीण विकास मैहकमे दे 11 मलाजमें खलाफ अनुशासनिक कार्रवाई शुरू कीती ऐ जेडे विजन दरखास्त मंजूर कराए दे ड्यूटी परा गैर हाजर रेह न। इनें मलाजमें गी खबरदार करदे होई ए.सी.डी होरें होरनें मलाजमें गी बी आखेआ ऐ जे कोई बिजन छुट्टी मंजूर कराए दे अपनी ड्यूटी परा गैर हाजर नेई रवे नेई तां ओदे खलाफ सख्त कार्रवाई कीती जाग।

<><><><><><>